



Optimizam i odbacivanje praznovjerja i zloslutnje (Meka)

Hatib: dr. Abdullah ibn Avad el-Džuheni

30. muharrem 1447. po Hidžri / 25. juli 2025.

Svaka hvala i zahvala pripadaju Allahu. Njega hvalimo, od Njega pomoć i oprost tražimo, i Njemu se utječemo od zla naših duša i naših loših djela. Koga Allah uputi, niko ga u zabludu ne može odvesti, a koga On u zabludi ostavi, niko ga ne može uputiti. Svjedočim da nema boga osim Allaha, Jedinog, Koji druga nema, i svjedočim da je naš prvak i vjerovjesnik Muhammed, sallallahu alejhi ve sellem, Njegov rob i poslanik.

“O vi koji vjerujete, bojte se Allaha istinskom bogobojažnošću i nipošto ne umirite osim kao muslimani!” (Ali Imran, 102)

“O ljudi, bojte se Gospodara svoga, Koji vas je stvorio od jedne osobe, od koje je njen par stvorio, a od njih dvoje mnoge muškarce i žene rasijao. Bojte se Allaha, Čijim imenom jedni druge molite, i čuvajte rodbinske veze. Allah vas, doista, nadzire.” (En-Nisa, 1)

“O vjernici, bojte se Allaha i govorite samo istinu, On će vas za vaša dobra djela nagraditi i grijehе vam vaše oprostiti. A onaj ko se Allahu i Poslaniku Njegovu bude pokoravao – postići će ono što bude želio.” (El-Ahzab, 70–71)

O ljudi, bojte se Allaha onako kako Ga se boje oni koji se Njemu iskreno obraćaju. Čuvajte se kršenja Njegovih naredbi onako kako se čuva onaj ko je svjestan polaganja računa i izlaganja djela pred Njim. Obožavajte Ga iskreno, i budite svjesni Njegove sveprisutnosti (znanjem) onako kako su svjesni oni koji vjeruju s čvrstim uvjerenjem. Probudite se iz sna nemara, prošao je mjesec muharrem, a nastupio je safer. Izađite iz drijemeža neznanja, i uzmite pouku iz prolaznosti vremena, sretan je onaj koji se poukom okoristi.





Znajte da je Uzvišeni Allah poslao Svoga Poslanika, sallallahu alejhi ve sellem, s jasnom uputom – da izvede ljude iz sljepila i da Njegovim svjetlom otkloni tmine paganstva, fanatizma i hvalisanja porijeklom, proricanja pomoću strijela, praznovjerja u vezi s danom i zvijezdom. U islamu nema nesreće u mjesecu saferu, nema “zastoja” u džumadi, nema sreće vezane za dane, niti zloslutnosti u srijedi. Islam je došao da porazi zablude paganskog (predislamskog) vjerovanja i da kod muslimana izgradi ispravno vjerovanje, zasnovano na ispravnom tevhidu, monoteizmu, snažnoj vjeri, i udalji ga od iluzija koje vrijeđaju ljudski razum. Čuvajte se zloslutnosti i praznovjerja, jer to donosi nesreću, loše mišljenje i vodi putem neznalica i nevjernika.

Uzvišeni kaže: “Reci: ‘Dogodit će nam se samo ono što nam Allah odredi, On je Gospodar naš.’ I neka se vjernici samo u Allaha pouzdaju!” (Et-Tevba, 51)

Ne kудite vrijeme i godine, ne budite praznovjerni u vezi s danima, mjesecima i godinama, i ne pripisujte štetu niti korist nikome osim Onome u Čijim su rukama sve stvari. Nema nesreće u mjesecima ni danima, ono što je Allah odredio mora se dogoditi. O ljudi, mržnja prema vremenu je ludost!

Poslanik, sallallahu alejhi ve sellem, rekao je: “Nema zaraze (same po sebi), nema praznovjerja, nema ptice koja donosi nesreću, i nema nesreće u saferu.” (Buhari)

Također je rekao: “Onaj koga praznovjerje odvraća od njegove potrebe, počinio je širk.” (Ebu Davud)

Najnesretniji dani vašeg života su oni u kojima ste počinili grijeh i drsko se osmjelili na ono što srdi Onoga Koji poznaje sve tajne. Svaka nesreća leži u nepokornosti Allahu, a prava propast je u odvažnosti prema Njegovim zabranama. A najsretniji dani su oni u kojima ste pokorni svome Gospodaru, Veličanstvenom i Plemenitom.

Zato, o muslimani, bojte se Allaha, pokajte se i vratite svom Gospodaru, odazovite se Njegovom pozivu, i učvrstite vjerovanje i tevhid dobrim djelima utemeljenim na ispravnoj akidi. Ne prezirite nijedan dan i nijedan mjesec. Imajte lijepo mišljenje o Allahu, budite optimistični, jer optimizam je nada u dobro. Pouzdajte se u svoga





Gospodara i ponavljajte riječi: "Allahu moj, niko osim Tebe ne donosi dobro, i niko osim Tebe ne otklanja zlo, nema snage niti moći osim s Tobom."

Ili: "Allahu moj, nema dobra osim Tvog dobra, nema zla osim s Tvojom dozvolom, i nema boga osim Tebe."

Uzmite Kur'an za svog vodiča, jer On je svemu dao mjeru. Očistite srca od prljavštine i njihovog pomračenja, koje dolazi od neprijateljstva, mržnje, razdora, loših i pokvarenih namjera. Govorite blago, dijelite hranu, širite selam, održavajte rodbinske veze i klanjajte noću dok drugi spavaju, prije nego vam bude uskraćeno ono što želite, i prije nego što budete vraćeni Onome Koji zna vidljivo i nevidljivo, pa vas On obavijesti o onome što ste činili.

Uzvišeni kaže: "Ako te od Allaha neka nevolja pogodi – pa, niko je osim Njega ne može otkloniti; a ako ti kakvo dobro podari – pa, samo je On svemoćan." (El-En'am, 17)

Iz svetiljke poslanstva dolaze nam sljedeće riječi, koje prenosi Ebu Hurejra, radijallahu anhu: "Nema praznovjerja, a bolji od toga je optimizam." Ashabi su ga upitali: "A šta je to optimizam, Allahov Poslaniče?" Rekao je: "Lijepa riječ koju neko od vas čuje." (Buhari)

O vjernici, budite optimisti, jer svaka nevolja koja nije Vatra (Džehennem) je olakšanje, svaka tjeskoba koja nije kabur je prostranstvo, i svaki grijeh koji nije širk je oprostiv.

Čak i ako ne vidimo ljepotu u iskušenju, sve što je odredio Uzvišeni je lijepo.

Bojte se Allaha i budite pokorni Njemu u tajnosti i javnosti. Ispravite svoja vidljiva djela i ona u srcima, koristite svoje udove u pokornosti Njemu kao znak zahvalnosti. Čuvajte ono s čim je došao vaš Poslanik, sallallahu alejhi ve sellem, i često donosite salavat na njega. Jer, u salavatu su nagrada, uspjeh i primanje dobrih djela. Čestim donošenjem salavata rješavaju se problemi i teške situacije, otklanjaju brige i izmiruju dugovi.

